

四庫全書

集部

欽定四庫全書

槩菴集卷五

元 同恕 撰

說

伯順御史松壑說

盈天地之間者萬物也其類有四曰飛潛動植四者之中各有天地英秀之氣間值以成形故其精神相流動相感通有不期然而然者類殊而生同也植物有松所謂間氣之值而非衆木所可班蓋春榮夏茂秋實冬枯

木之常也或資腴壤以厚其培或託沮洳以豐其澤遠  
不數十年而枝摧幹裂人已興薪樵之念矣何顧惜之  
足云松則異於是不根於原隰衍沃之間而危峯絕壑  
之是踞沈浸乎風雲厭飫乎霜雪其取之天地浩然者  
不既多矣乎磊磊落落挺百尋而直上蒼蒼鬱鬱貫千  
歲而不改貞心勁質長材大器王者之堂不構則已構  
則其舍諸是以聖如孔子稱之曰歲寒然後知松栢之  
後彫達如蒙莊氏亦曰受命之地唯松栢獨也在冬夏

青青歷世以來豪雋邁往之士莫不樹為表儀發為歌  
詠以著其觀瞻愛悅之意此豈松所能為哉生之所同  
然者也伯順御史公寓名松壑豈亦氣機之動於中歟  
公生長名門服習忠孝剛方而達事通朗而好學試之民  
庸則已興歌別駕矣朝廷謂不可小知也擢置六察以  
肅西臺風矩之嚴言議之正凜凜乎縉紳觀聽者三年  
于茲得賦之異如此固宜神會物理以涵其用異時登  
材具瞻使國威增重泰山四維真能言之棟樑也松一

物耳其所負荷顧可同日語耶人將曰公不負松而松負公至治壬戌六月辛巳同恕書

銘

力本齋銘

木則有根水則有源由性之善受名曰人封之植之月異歲新䟽之濬之母俾汨湮譬如農夫是播是耘崇墉之獲以對其勤澡智浴義帶禮依仁循循勉勉顏樂可臻正父名齋以警惰昏勇貴能用先民有云

行狀

竇周臣先生行狀

先生姓竇氏諱繼祖字周臣世家京兆高王父興曾王父公明皆滅跡藏用王父璋金明昌間自進士登高第調主邠州新平簿遷蘭州龕谷令邠州節度判官入為尚書戶部管勾加奉直大夫德氣粹然鄉邦畏慕皇考王力學有聞娶李氏生二子先生其伯也以泰和三年二月十六日生幼時讀書即知向嗜少長從鄉先生張

國寶學堅苦自勵既猶以為未至於是歷走當代名公之門如浩然王先生郎中蘇先生奉事彌謹二公嘉其篤實樂為啟迪故先生之學問視他人為有得也正大末京兆浩穰迫徙洛陽居歲餘京城不守先生乃徇衆出降渠帥盡驅以北過太行先生給以採拾遂脫身南走至平陽隱居教授者且數年癸卯春太傅耶律公行省陝右道過先生以儒者見與語悅之遂拉西還仍授館請教諸子以故復得名於鄉邑先生資稟純直寡言

笑諸經靡所不讀尤潛心於書雖家事叢脞未嘗一日  
去手教諸子嚴而有法盛寒大暑諸子夜誦必身莅之  
率至三鼓平生居處服用聞者苦之而先生終身坦夷  
畧不介意嘗曰願吾子孫勤力經史悉心孝弟天之福  
我也亦厚矣富貴貧賤蓋有命焉豈智力之可移哉其  
安分寡欲落落如此不幸感風疾且病時召諸子具衣  
冠戒以雍睦末曰吾家世為儒異端之學絕所不道汝  
等誠有愛親之心大事其一從禮良久乃卒年七十有



六至元戊寅正月十有四日也娶朱氏先亡再娶尹氏亦亡俱無子今處室者為建氏生六子汝賢汝良汝舟汝楫汝霖汝礪良舟皆先卒孫男十人女三人汝賢等將以三月五日窆先生於長安縣七家里先塋之北泣謂友人同某曰汝賢與子所謂世契者先君行事之實子其悉知盍為汝賢狀之以句銘於當世賢者非故為張大以求知於人姑以識汝賢等追思之情耳某竊惟先生與大人居同里開學同研席相愛之心老而彌篤

其之朴魯亦嘗蒙提耳之誨其何敢辭姑次第其修已之大經惟高明擇焉至元十五年正月二十五日狀

雷經歷行狀

謹案雷氏繇經歷君而上六世祖諱彰自馮翊中雷村壻於河中府河東縣陶邑鄉東張尹姚氏始為河東人嘗謂子孫曰遠祖自豫章徙馮翊碩學長德聲烈書於信史若曹其識之及病且終遺令曰生不及養親死不獲祔先塋有遺憾於九泉矣葬我必西首無易吾意今

瑩兆南向西首從治命也五世祖愿高祖信曾祖豫祖  
時饒於財樂賑人之窮急不惑方術言嘗築後垣人以  
歲君所直禍不可測不聽功半而摧言者譁然因踞胡  
床於下躬視役作終堵乃罷後亦無他父諱思齊字希  
賢邃儒學篤於踐履化行於鄉訟者徃徃求質或未至  
而返治家以樸素率下冬一紙帳夏坐大樹下課子弟  
耕鉏讀書唯知有恩禮不較利多寡故族里內外舉欣  
欣也歲饑麥將熟率童僕行田見竊刈者數輩輒趣還

避之人問其故曰彼皆良家子以饑甚不顧盜竊之名以求生也未能食之忍辱之乎所為文兵後散失今存者塔墓石刻數篇而已妣張氏生二子長震威次即經歷府君諱震通字伯達以金明昌四年癸丑歲二月十七日丑時生生十六年而孤服闋娶同郡胡氏長女未幾調南北兵使者發卒河中急甚其兄與君爭往曰弟幼為老母所憐且以次某當行君曰某愚不能生產作業兄往則誰使養母某足能從事議久不決使者始未

信既則疑訶左右得其情乃謂諸君曰吾視少者居行  
皆不可即奪長者此媼必無全理吾欲姑置之而請於  
上汝曹將謂我私此家也奈何皆曰此家令聞有素公  
若釋之誰忍為異言者使者委之而去竟獲免明年其  
兄震威卒時蝗旱饑殍滿野壯者死鋒鏑老弱困轉輸  
堡壁盡閉墟無炊煙君外應繇役內奉老母保護鄉閭  
皆賴以安己卯六月丁母夫人憂天兵南下與衆入峪  
南西堡避兵或給之曰府中吏民盡走關西不我顧矣

衆大懼相謂曰我等烏合於此不有統屬何以集事共  
推君為都統得軍三百餘謹教條蓄財穀完吏農力諭  
富室出粟佐軍募貧者給其衣食為遊兵伺非常居數  
月一卒扣壁門曰我邑人某先降者來語若輩明日大  
軍且至能以壺漿相迓保無虞也衆視不敵各分散逃  
匿君與族里數十人伏地室中俄數百騎至訶知有伏  
積薪其上呼曰不出且著火趣之甚急衆恐見誅議出  
降未幾斷事官耶律公辟授經歷公即濮公猶子濮公

嘗子之者後奉使陝西驛過河中拜掃先塋經界田宅  
置親戚守衛之至長安初壬辰之破許州也君俘獲王  
生善遇之生有疾使二兵輦以行至懷病不可與俱留  
於旅分囊金而去後絕不相聞者十年至是行省田公  
節鎮陝西公置酒大會起捧觴言曰吾客有王生者善  
琴律頗涉書史吾且友之生常言往在軍因死者數矣  
為君所俘生死肉骨深恩久未報奈何君能釋請以數  
人贖之因呼生出拜君驚喜曰與生久不相聞吾以為

託非其人不能全生也豈期復遇於此耶生感泣君亦  
泣顧謂田公曰王生僕故人處公門勝在僕多矣奚以  
人易為哉政可著儒籍中耳樂飲而罷王生後以琴進  
朝列官數子亦宦達云西還至臨晉始遇其姑表姊於  
兵後適疽發於背試諸方不驗其一僕素名知醫云某  
能療之投之藥輒效乃留其僕而去從耶律公北覲因  
命公大較天下錢穀開府燕都公奏與君俱君辭公強  
之不得欲奏之君曰今欲某行非以觀美求集事也苟



言不見從雖行何益公問其故對曰今典章未備豪族悍將不蹈軌轍腴民膏血賂權倖以自安聞此舉爭竭力而求若能自刻礪修潔他日或可自明不然雖使其殞越軀命無益明公之傾危也公矍然曰吾能為之遂偕至京師諸侯藩將率僚吏輦圖籍金帛不可勝紀公視事之日懸示紀綱諭以刑賞謁拜於邸第者皆辭不見秋毫莫取內外肅然官給廩餼悉以還之出私帑以給僚屬不足則立券以稱貸於人掾吏畏之莫不自勵

未幾憲宗皇帝即位。歸之居官奉使。越職貪殘者皆坐誅。怨家以飛語誣公。召詣行在所。考覈罪無所得。尋貫出之。公由是益親信。君明年壬子八月疾。輒不食。盥沐衣冠。問何時矣。安坐而逝。享年六十時。廿六日也。配胡氏。卒。再娶高氏子三人。長守義。前太傅府知事。次守禮。皆胡氏出。次守信。江西行省掾。高出也。女四人。適賀欽。楊某。劉某。楊某。孫男七人。復介。世忠。恒益。觀天。澤女。適安。謚中統二年某月日。知事君護柩還葬於河中先塋。

之西南君神觀修整辭氣樂易讀書不事章句尤篤於  
倫理嘗逺回知事君時幼當戶而嬉君抱持之拜其母  
於堂上母怒不食曰別久方還抱兒而後拜母乎跪謝  
良久乃免嘗小忤於族兄銜之一日君自外歸拜於床  
下其兄忽袖出巨杖擊之後陰雨即臂痛終身無怨懟  
意其兄早世一子甫一歲君取鞠養崎嶇兵中逾於所  
生人不知為姪也居處清肅妻子若見嚴君終身未嘗  
同几案食嘗令知事君他適及暮歸大雪反命門外語

未畢聞君鼻息聲不去君久乃寤問曰汝尚在耶其嚴  
如此公退常有胥史輩來習法令書數所親或謂之曰  
君子孫秀敏者多獨不可以此教之乎君慨然曰吾所  
以為此者負初心勉為之耳使兒輩力田學書足矣其  
愛人利物之心猶饑渴之於飲食常自誓以聚親戚活  
人為心兵興親知之相失者皆籍其姓名以自隨所至  
推訪將死者活之逃者追之俘者贖之北還時薦饑大  
疫斗米白金十八兩君與之共起居甘苦視藥餌皆免

於難既而以時昏聘為植產業其子孫迄今賴之嘗閱其籍曰得者過半矣手澤今存焉君之父昆季七人兵後皆散失求訪得六族其一無聞近知事君聞其後裔為太原右族所俘亟命其子親往求得之與之緡錢贖於太原民家君從軍多奇策論功未嘗出諸口賞賜悉與士卒居官清儉勤敏始終如一常徒步視事公府值雨或披蓑以歸數筦財用謹出納簿籍歷歷明甚故兩公益愛厚之御下嚴而不苛寬而不弛隨材任使得其所

長故其生也敬之如神明其沒也喪之如父母今幾何  
年矣建事者語及猶欷歔流涕愈久而不忘也君嘗曰  
吾自癸卯展轉兵間四十餘年跋涉數萬里冒矢石歷  
險阻饑凍無俘獲玉帛以傳於後但得骨肉近百口他  
活者以千萬計所以保殘軀家累於兵荒之餘者皆祖  
宗德澤深厚餘波之所及也子孫其毋忘之初知事君  
從君西征徙家關中以先塋限大河之險恐後日子孫  
不能反葬其處曰吾家故京兆人也乃別卜咸寧縣白

鹿鄉平里卒遂葬之某獲從君諸孫游皆才識卓越讀書克家師表闕輔其季則列官顯要矣知事君無恙時入耳皆好音舉足為樂地歲時上壽秀眉丹頰偉然神仙中人燕歌趙舞之娛鸞脯豹胎之養子孫王謝嫺戚崔盧雍雍肅肅四氣之和備集其家監司郡守踵門謁賀而聞者莫不咨嗟歎賞謂近世鍾慶所未有也今仲介求次君行實夷考始終乃知積善所自傳言非在其身在其子孫信乎某輒不自揆謹撰次族系壽年居家

事上以備立言君子之採擇云大德二年七月望日狀  
墓表

中書左右司郎中李公新阡表

延祐二年乙卯晉寧李用介吾友陰陽教授元君仁卿  
再拜懇言用來安西二十有八年矣歲舍癸丑始克相  
地咸寧縣洪固鄉鐵盧坳之原遷奉祖考雪谿府君而  
下凡再世十八喪葬以四月庚申伏念先祖脫死兵凶  
載名祿籍艱勤所就以覆露我後人者不概表見垂示



永久烏用有孫焉矧今宅兆為西遷始祖尤不可無徵  
於後私門重事孰加此者誠願託筆執事執事儻憐而  
許之用之責其塞矣乎則又拜予迫於禮之恭辭之確  
不得以不文謝乃受所持家記一篇按而述之公諱庭  
秀字君實世為太原文水人系出唐司徒忠烈公愷雖  
昭穆失譜遠有承傳曾大父言大父順父寬皆葬其縣  
神交鄉韓村至公始數名晉寧母張氏生二子公其伯  
也六歲而孤警敏異常兒母氏課讀書日熟數千言八

歲中金經童選明年母卒公痛二親棄之之早也思以  
立身揚名為報乃棄家依道宮專力舉業貞祐兵作河  
東諸郡鞠為榛莽公亦轉徙南北以紓旦夕之命及再  
家平陽年踰冠矣益從事文史以堅夙志帥府聞其才  
辟主軍書從征累歲主帥由公言活俘獲無萬數以勞  
擢陞經歷尋兼詳議左司勤審明練一府倚重中書胡  
氏繇侍從行相府河東素熟公能即版授叅議左右司  
郎中佩金符歲辛卯也時官制未立皆從宜一切壬辰

以公見行闕奏改行中書省左右司郎中佩金符仍初  
悉心佐治機務之重同列有不得與者獨委公區畫始  
終凡三見寵訓丁酉兼權本路徵收課稅副官戊戌陞  
郎中提控左右司時公方四十已興懷止足後二年宣  
差提領諸路課稅所以公廉悉著特授監擁平陽路徵  
收課稅官即謝歸屏處閭里日與高人勝士為道腴義  
悅之交賦詩酌酒更號吟醉散人見者莫測其際鄉先  
生李明之張子顯為著畫贊歲乙卯九月廿有九日疾

終正寢壽五十有七配尉氏樊氏赫舍哩氏子男七人  
思聰思敬揚州錄事判官思忠思溫思明思義用之考  
也思問女六人長適雜造局宣差郝某次適副使喬某  
次適高某次適汪君澤次早卒次適張秀孫男十二女  
五曾孫男女十五公通敏修潔慈良信厚鍾秀五行耽  
嗜載籍不輟寒暑使其當大寧之世優柔厭飫極欲所  
為雖與古君子方駕並馳不多讓也遭罹變故奪生萬  
死而能返吾初服推心力之餘以顯其親急流勇退遺安

後人斯亦可謂加於人一等矣始公自為傳有曰無所  
屈於人足以為貴無所求於人足以為富又曰成人者  
自成也毀人者自毀也嗚呼此非苟於為言亦可以見  
公之曾懷本趣矣傳曰德遠而後興宜乎有耀自他孝  
孫起家首營松楸以厚本基天其或者殆將復其始也  
邪予故論次之如此俾揭諸墓左以為永永奉嘗者之  
鑒云

從仕郎李君墓表

君諱德玉字仲德姓李氏其先廊州人祖諱某妣趙氏  
徙居晉寧父澤潤夫妣王氏再世潛光至君始家奉元  
築別墅于城南草場坡南宮村面勢軒豁廼即其地規  
卜新塋遷奉祖考妣考妣四喪合葬如禮弟思溫婦劉  
趙以序陪列門垣翼翼柏檜森森過者聳瞻君生資強  
明遇事破竹儀度瓌偉人謂冠玉初為泰州豐利鹽場  
管勾陞從仕郎解鹽司判官以故官轉懷安州鹽司判  
官三任皆有聲稱年三十六遂收蹟宦途從事丘園之

樂日與耆年宿德談笑相遇間從方外之士遊人有緩急輒圖拯之親戚貧乏月給薪米費獲免流離者數家草場坡通途歲久岐而為三高下洒削阪側不可行覆車前後相望人甚苦之君捐金募民相治南北為步六百餘迄成坦途又嘗募民塞城闕孔道為霖潦積壞者凡三所率數十工役十餘日積歲十有三作車馬往來為利不貲嗚呼使君得究所用推濟人利物之心豈止如是而已哉延祐二年十月十二日以疾卒于正寢享

年六十五妻孫氏前卒再娶孫氏側室汲氏亦卒一女  
年十三而夭卜以其年十月二十八日葬南宮新塋孫  
氏汲氏祔焉惟君剛毅正直善者好之惡者不畏交游  
推誠相與力扶其危面折其非人頗嚴憚之練達世務  
議論多可採其才有用而其志不屑屑于貴勢盛年勇  
退茲其為難能者非耶歛藏智畧以入家政祭祀豐潔  
賓宴華盛一門之內訐訐肅肅恩威兼盡每歲生朝感  
念劬勞即墓所修祀事未嘗置酒為樂給鰥寡孤獨錢



五百緡疾病約諸子錢家能還者止受其母貧則輒為  
燬券其輕財重義類如此僕與君有姻族之好居又連  
牆嘗推屋地丈餘以相壽蓋棺之託其忍辭諸乃為叙  
次如右云

彭氏新塋石表

泰定二年秋八月建士彭炳元亮不遠六千里再來訪  
予素冠素衣形悴色慘予驚問其故元亮拜且泣曰往  
歲炳受命先君求學闕輔先生不鄙其愚收而教之及

歸覲省時先君棄養已三年矣遺言示炳計蓋離膝下  
纔兩月耳惡逆如此天地所不容然不敢即死猶忍毒  
須臾者兵亂以來四世之喪未葬炳實受其責僂俛謀  
地崇安縣南十里龍岡之南菴用至治三年秋九月丙  
午舉曾大父武夷翁妣江氏大父好古先生妣徐氏世  
父柳溪先生父里仁府君從兄弟柳溪之伯子季子八  
喪六封左昭右穆如中州法族葬之蓋先君治命也賴  
祖考之靈僅畢營奉則又惟念獲罪於前既不可贖我

祖考積仁累義澤覆子孫者使泯泯無聞於後豈不重有罪邪是用歷時涉月冒昧來此幸先生哀憐賜以石表之辭俾展省斯瑩者永以為勸即出家世履行之狀授之予以元亮修潔善學孝思無窮固知先德垂統之令可標示久遠託諸老詩得非誤乎然不敢終辭也為掇其語而序之按彭氏五代時自光州徙居建寧之崇安家牒燬于兵莫詳所始武夷翁諱康叟生好古先生好古諱九萬字子遠文學氣節偉望一時有子五人長

柳溪先生諱桂子字達觀聰敏絕人幼時從其父在太學讀書強記一過輒不忘文行名庠序忠信稱鄉黨次里仁府君諱似孫字子如炳之考也天性孝友事其兄柳溪如事好古推仁擴義無間險夷宋亡之變人爭逃死山谷間鄰母屢墜險里仁屢負出之母曰子無以我故受禍終不忍棄去歲大疫至親猶不相過閭巷有盡室呻吟者里仁日至其家視粥藥所宜人得免死疾亦不相及蓋惻隱之發根乎純心其遇事而見者類皆衆

人所不肯為嗚呼異哉享年六十有四以延祐七年十二月二十二日卒初娶吳氏有子善善甫三歲俱失兵間再娶嚴氏生三男長即炳也次祥讀書力家次天女三人嚴氏勤明莊整里仁再家內職居多嘗戒其子曰而家世為士號稱盛族淪謝之餘獨汝兄弟與兄公之孫三人者在而不種學樹德以振起而家吾何汝望哉斯亦可謂能母矣且彭氏有家崇安歷數百年先世往往以賢德著鄉評讀書力學踐修人倫日用之實而蓄

休儲美以敷遺後人者至矣遭罹兵變里仁脫身百死  
克還舊貫收亡合散使彭氏之祀再傳教子義方便彭  
氏之學不墜非所謂原之深者其流長耶元亮佩嚴範  
于前服慈訓于後松楸事大既已成先志矣立身行道  
以顯其親不在此其將焉在予故論次之使表其墓如  
此好古最少子名立孫徃後族祖氏里仁同母弟也三  
子名昌四子名安皆自變亂中淪跡異教里仁異母弟  
也柳溪二子曰燾曰同今惟燾之子堅與元亮兄弟同

居云三年二月清明日述

贈奉議大夫奉元路總管府治中李君墓表

秦定二年三原縣龍橋鎮李善繼以奉議大夫知延安路鄜州事當進封其父子懋子懋之言曰子孫生世凡皆先澤所遺今以不肖之身竊榮寵典而吾親弗與其如報德何朝廷許其孝誠乃贈祖定奉議大夫奉元路總管府治中驍騎尉追封三原縣子祖母左氏三原縣君命下之日老幼感懼隕拜禮告既卒事子懋之兄子

敬相與謀曰先人奪生於死躬燾後茲德罔極吾聞  
先美弗彰是謂不孝禮分或踰是謂不遜茲者蒙被國  
家不貲之恩褒賁泉壤矣修身齊家所以覆露我後人  
者不紀之石將何以示來裔乃具行世始末謁辭於子  
子與子敬兄弟游且久雖未嘗瞻望儀範然即其子之  
樂善不倦而其善所自出益可知已既不得以老諄辭  
勉為次第之君諱定字叔靜其先隴西成紀人從徙奉  
元雲陽縣海青村遂為其縣人族聚有家者至四十餘



曾祖諱建祖諱欽考諱吉謹敏好學有文稱金季鄉貢  
進士妣程氏君生貞祐庚午三月十有三日舉止端重  
不類常兒七歲遭時板蕩艱難顛沛中已知避就不  
貽長者憂逮與衆歸義年甫冠矣隸大帥色卜岱戲下  
從東征者又數歲闕輔初集君亦得還羣從聲沉影滅  
獨兩叔在君於瓦礫榛莽中求得故產經營盡瘁唯力  
是視既又感奮出門為頻拾仰取之計東涉淮濟西歷  
絕徼諸城周旋四遠者餘二十年貨儲饒裕舊觀浸還

則喟然嘆曰吾昧先人清白之傳自棄於逐末恐無以濟禍亂使李氏不聞於世耳乃定居三原龍橋鎮謂藥物功在濟人為術亦不苟命諸子以藥為業必擇所出精良者售人鄉黨困疾一不取直烏蘭濟達之嗣先帥也版君管民總把時兵猶未戢生意方漸君撫以恩信賦役之煩輒出私帑為代輸之民于今猶頌德潛心時用應務有餘國言之習騎射之能皆過絕人至陰陽占卜之學亦深造自得嚴毅敦實濟以詳明家事鉅細有

倫有要教育子孫首格驕情者舊交際間里往來過中  
過厚無一毫校計彼我之私故人皆不疾其有而樂其  
德我將詩所謂在彼無惡在此無數君其庶幾焉元貞  
改元八月十一日疾卒正寢享年八十有六配陳氏左  
氏子男三人子明卒延祐丙辰子敬宣授進義校尉烏  
蘭濟達投下管民匠官子懋賜官承事郎兄弟孝友勤  
恭勇於為義由親及疎昏喪不能以時者身任其成振  
寡逮鰥已責紆逋一遵前軌創三皇廟於鎮之西使人

知所歸仰闢學古書院以教成遠近來學者兩區規模  
無愧大府蓋糜錢二十萬緡廩食不計也仁者之勇為  
何如朝廷嘉之表其門曰義士女三人長適龍泉縣尹  
田茂次適馮天祐次適萊文進孫男八人曰英曰秀宣  
授烏蘭濟達投下汴梁民匠總管曰善繼即奉議也曰  
善述曰善淵曰善道曰善可曰善禮孫女十人俱婚良  
士曾孫男三純承事郎及稊倉使企移住玄孫男二二  
年五月二日葬三原縣清豐原雒村陳左兩夫人祔後

三十有五年乃樹石墓道而表以辭曰嗚呼志力弗強  
必不能自拔於患難驕吝弗克必不能無毀於滿盈有  
若治中君奮起於洪流昏墊之日而致謹乎宴安鴆毒  
之秋豈惟模範於一家固可以師鏡鄉邦矣哉者培之  
天不可信邪善始善終福總於前令子令孫光照於後  
存歿無憾者惟君之獨也况善繼恪慎克孝有列聯仕  
滋至之休可立而待敢敬表其墓而為之兆云至順改  
元冬十月朔旦述



梁菴集卷五

欽定四庫全書

槩菴集卷六

元同恕撰

碑銘

贈嘉議大夫禮部尚書郭公神道碑銘

聖元德教醇深涵濡滋久人才所就梗楠杞梓隨用隨  
得入可以儀朝著出可以殿藩服才名卓卓以孝作忠  
者蓋不乏人亞中大夫平江路總管兼管內勸農事郭  
侯鴻漸諱鵬翼天資高朗博學多聞嫻於國言大臣許



其詳辯有助敷奏玉音召對以字不以名持心忠謹事  
無大小為之必盡其方初命中書直省舍人仁宗登極  
郊廟大祭首預執事選不數月以副江西行省理問決  
獄廣東獲俠賊贛州正賊吏掩覆罪風望峻整行省行  
臺露章交薦延祐四年入為中書兵部員外郎督受海  
運糧二百四十萬斛防禁周密不失圭撮賞錦衣一襲  
實諸監院託以興造橫費縣官錢三萬餘錠貴近為之  
屏氣六年拜監察御史登美黜惡其言皆大政所關是

年冬慎簡東宮僚屬擢太子家丞七年三月再入中書  
兵部為郎中柄臣怒嘗言已必欲以事中傷卒無所得  
明年至治改元僉河南道肅政廉訪司事糾劾吏惰詢  
察民勞不旬日決積滯六百餘事河南士民鼓舞記遺  
政于石南陽復古陂堰三溉田之利不可畝計民皆即  
其地刻石頌德二年加湖廣等處行省郎中其冬復入  
為中書工部侍郎董鑄內府金銀以錠計者一萬三千  
有奇錙銖中程數詔賜金帛二兩泰定元年遂拜今命

均徭齊賦以裕民嚴程謹法以束吏勸力農桑篤意學  
校踰年風化改觀行省移書獎勞最優敭歷迨茲十有  
六年八被璽書再受勅書若省若臺爭舉競用類曰是  
才行卓偉政事明練者斯可謂能以孝移忠矣侯惟奔  
走南北不獲致孝松楸為歲已久乃懇告來歸一日持  
其先大夫嘉議公行狀造某所拜請曰鵬翼不肖蒙賴  
先訓叨位三品恒念無以報罔極國家鴻恩追榮祖考  
既已致論告於墓下矣神道之碑亦法所許願先生銘

之以信來者謹按公諱德字彥修其先太原嵐州人祖諱壽妣曾氏始徙晉寧之絳父諱福贈亞中大夫懷慶路總管輕車都尉太原郡侯母李氏贈太原郡夫人皆葬絳之橫渠公敦厚謹重在童幼嶷然如成人讀書略通大義尤精六藝之數始為樞密院宣使受知左山商公及左山來相安西王開府以光監支納千斯倉廩庾維溢民不讒多取關中饑委公告糴晉寧不踰月粟輒畢集陞安西鳳翔抽分羊馬官已乃不樂進取買田成

寧縣鳳棲原北留村治生教子優游自適與人一以誠敬子弟有過未嘗厲聲色溫言開諭使其自改憂人之憂不計有無鄉里合辭推為長者享年七十有五以大德四年十二月十有四日卒配李氏贈太原郡夫人勤儉莊整嘉議創業內治居多前公一年卒子男二伯惟欽仲侯也女三長適劉氏次白氏董氏孫男三忱恒忼忼力學蚤世女八趙郁白某盧某李某魯齋書院山長王適趙某趙允其婿也一在室曾孫男六女三葬以其

月廿日地則北留也嗚呼公以仁厚篤實之基培之於  
前聰明特達之用開之於後天有顯道厥類惟彰矣矧  
今三被恩典累爵郡侯有子之慶如公方將是敢槩見  
侯之用也以為神榮焉銘曰木蟠于根有材蠹雲水畜  
于源有流成川繫慶之多來善之遠孰晦於昔而不今  
顯猗歟嘉議我車既堅脩途幾時六轡是旋休休其中  
翼翼其外乃室乃家春風卒歲是生令子振鷺西雖民  
有遺愛國有雋功追爵九原侯封載啟永言孝思令聞

不已北留之阡喬木蒼煙其固其安其千萬年

少中大夫嘉定路總管趙公神道碑銘

書言惟孝友于兄弟克施有政西周盛時良臣顯輔有  
辭永世如君陳者本其充積之懿則以令德孝恭為稱  
荀孔子亦曰居家理故治可移於官信哉若今少中大  
夫嘉定路總管趙公以得賦之厚著移孝之忠殆所謂  
本深者歟公諱玉國言別諱穆爾齊其先女真人祖林  
仕金以金紫光祿大夫守積石州天兵南伐度義來歸

詔為軍民元帥即鎮其州妣夫人李氏尚氏考文顯膽  
略絕人襲元帥職仍賜金虎符屢以戰功獲袍帶弓矢  
之賞加昭勇大將軍西寧漢陽等處都達魯噶齊妣夫  
人郭氏公昆第十人於次為二至性孝友讀書善騎射  
父母鍾愛之早以世胄入給宿衛至元九年安西王分  
國關中擇良慎者侍王邸教以公為鄂囉齊典府藏也  
已而從王北征立功絕域十六年奏授朝列大夫慶陽  
府達魯噶齊兼管本府諸軍鄂勒勸農事為政本於德



惠利無不興害無不去法行而民信之教立而民安之  
治聲蔚然二十二年以故官移監徽州漢人居是官故  
事所不許二十八年復以朝列大夫知慶陽府事公再  
撫吏民最十八年益嚴自守仁洽義浹民阜而俗厚盜  
息而刑清隴西諸郡獨是為樂土矣至大元年陞少中  
大夫嘉定路總管兼本路諸軍鄂勒管內勸農事啟行  
之日慶陽民無老幼泣送道路遮不得行居治四年寬  
以綏衆明以察下令不便民事不適義必改而更張之

建御書樓敬教勸學謠頌以興辭疾還慶陽越二年終  
命正寢實延祐二年六月十五日也享年六十有六三  
夫人石氏田氏路氏子男三延壁前卒次允忠允寧女  
二長適中議大夫貴直屯田鷹房打捕總管阿縹納次  
許嫁未行始公祖考皆葬積石州來去城至是以公遺  
愛在慶陽得卜於合水縣漢城社以某年八月二十六  
日合葬公及石夫人焉公器度宏遠寬厚自將長身修  
髯音吐洪暢事父母愛敬兩盡與弟武列將軍志忠顯

校尉義輩如塤如箎有恩有文居官以利民為心奉法  
為職同僚無違言下吏不忍欺嗚呼斯所謂淑人君子  
者非邪使得究其澤施所及顧不遠且博乎是可惜已公  
歿之明年其子允忠持寧州學正趙庭瑞墓誌文介商  
州判官成君玉行臺察院史張才卿求銘表隧之碑辭  
不得命廼掇取誌述叙而銘之曰英英少中克若帝衷  
予以吾孝臣以吾恭坦坦休休一其初終不懈于位不  
汙其窮既踐世美亦奏民庸廿年慶陽杜母召翁嘉陵

之頌穆如清風漢城南岡享祀惟公

誌銘

段思溫先生墓誌銘

段氏世縣晉寧之稷山以儒學為顯姓先生諱思溫字叔恭金贈中奉大夫護軍武威郡侯諱矩者五世祖也矩生鏞鏞生汝舟汝舟生恒皆以文行推重當世恒生克已成己修己克己號遯庵與弟成己號菊軒同登金正大七年進士第世謂河東二段初未奏名既謁禮部

趙公某使誦所業賦公嗟愕久之起書雙飛二大字以贈後榜出果皆中高第自是段氏耿光尤著盛遜菴生三子長思永為時耆儒以終次思誠偉譽籍籍河中儒學教授先生其季也母梁繼樊先生及教授兄出自樊孝友慈祥由性而成年十二遜菴君卒哀毀如成人弔者增慟時甫脫兵變先生侍母夫人佐兩兄服勤朝夕萬戶晉寧李侯迎菊軒闢館授徒學者四集先生雖已能讀書通大義恒恐世學不嗣感激或至泣下欲從菊

軒卒業重違溫清母夫人察其意勉以好學為段氏福  
菊軒亦嘉其志樂以啟告先生遂肆力於學至忘寢食  
經史要義必手籍之始猶攻辭藝至是盡棄去求古聖  
賢問學之本究闢洛考亭之傳聚精會微以潤厥身菊  
軒深器之嘗曰是能世吾家者年二十一受室河中魯  
氏因遂居焉聚徒受業懇懇不倦一以成就後學為心  
諸生貧而可進者尤勸綏羽翼束修之薄不受也以故  
士爭趨風成才者衆家素貧先生損衣節食市書至萬

餘卷嘗顧而樂之謂以此遺子孫足矣嗚呼先生識慮之遠視安畎畝者風斯在下矣平居於書無所不讀尤邃易春秋郡侯張某素名學易請質所聞先生乃言聖人作易畫以成卦卦以立象所以明天地之理盡事物之情使人趨吉避凶然其道必本之人心盡其心斯知易矣近世惟程子朱子之學為能得之不必他求也張侯拱而嘆曰先生真知易者詩文溫厚平正粹然一根於理讀者知為仁義之人素位而行不願乎外皇子安

西王撫封于秦開府之初慎簡僚佐管記之選為尤重於是遣左常侍今陝西漢中道肅政廉訪使劉公某以記室參軍驛召先生辭疾不赴廉靜寡欲一介不妄取有以麥三十斛佐廩費者卒謝却之四川轉運使王某送二男僕以給薪水先生還其僕為書以謝轉運嘆曰廉士乃如此至元十五年丁樊夫人憂號泣推慕終喪如初後四年菊軒君卒喪之如遯菴先生於享祀斟酌禮經致誠致慤器用必親拭牲牢必手薦嘗語其子曰



祭祀所以報本也罔極之恩庸可報乎禮廢久矣世俗苟簡士大夫而忽此甚不可也且不知敬其先何名為人聞者心動率觀法焉二十五年春三月某日疾終正寢享年四十有九以某年某月某日葬於某塋妻魯氏淑慎之德克配君子子男三人長某行臺監察御史次某河東宣慰司掾次某鳴沙州儒學其一女適河津劉氏子孫男一德雄女五皆幼先生貌恭言從心平氣和道德薰襲遠近傾慕士大夫道河中者賓接無虛日談

經訂史情義傾倒語及時政則謝不敢知外雖恂恂中  
實有守義所不可奪以徇人毫髮不能也族姻鄉黨吉  
凶慶弔禮意周洽稱人之善覆護所短故人皆歡喜尊  
奉語必稱先生不敢字或小犯義必私自愧悔先生得  
無知乎下至市井傭販亦能目以好人卒之日闔城赴  
弔市為之罷送葬者執紼近千人為位而哭者相屬於  
塗嗚呼以德服人者中心悅而誠服今於先生見之矣  
使其達而行義兼善天下固非難事天不假年識者惜

之而御史以才行致身方興未艾天其或者以是壽先生乎御史辱與予游乃者奉先生善狀請追銘寔石紀德之任大懼弗稱然不敢終辭也謹述所載系之以銘銘曰遯菴之高菊軒之奧言緯行經一世則倣先生嗣興于光有耀翼翼其心卓卓其操渙渙其文循循其教既洽善良亦馴桀驁胡德之忻胡年之悼天于先生將厚其報是生賢子臺閣騰趨以顯以揚以志厥道

鷹房民匠總管毛公墓誌銘

自予有心目之疾凡親舊慶弔往來絕不與者久矣今年夏毛甥時敏經杖屨然踵門拜且泣曰先君葬有期日人子為親深長之慮貲幽堂者銘不可無渭陽雖疾敢以死請予亦攬涕慨念從姊不幸蚤世總管公情好有加既不得撫衾一慟以訣終天於甥之情其忍固辭乃為叙次如左公諱翼字飛卿世為長安人祖文炳妣皇氏父彪以勤力起家教授孟公表其墓妣鞏氏癸巳歲三月九日生公河中避金亂也三歲還鄉里及家殷

盛無他昆弟姊妹獨公一人鍾愛無比公昏定晨省出告反面循循子道無一豪富家郎驕寵之習人謂有子如此毛氏安得不昌逮壯室強仕孝謹不少替服喪哀疚三年如一日蓋其至性非勉為也初以賢行選為安西路稅使歲課日增滿考難其代漕檄再任至元十年受安西王命總管安西平陽河南等路行捕鷹房民匠未幾兼安西慶陽拘權解鹽使時年未五十遂絕意名宦優游家居享有備福餘廿年以大德二年四月十五日

疾終正寢壽六十有六卜以後月庚寅葬公咸寧縣洪  
固鄉三爻村先塋妻同氏予從叔女也聰明靜順佐公  
事親得其懽心先二十八年卒殯之日姑輩慟哭過市  
觀者莫不流涕至是乃合祔生二子時敏力學而賢襲  
總管職時晦蚤卒一女適同誼於姊為四從姪再娶宋  
氏一子時可一女許嫁未行孫女四人壻齊哩克琨總管  
石孟瑛餘幼公身長六尺儀觀脩偉性簡曠質實無毫  
髮機穽師事退菴張公國寶藏書會友講學冬夜無虛

歲教子弟以禮交友以忠急人之憂樂人之善出於至誠故人以是愛公不以忌公也南士蘇桂高奴鬻於市捐金贖之俾隸儒籍翰林學士柳城姚公誦以詩曰一善長安已戶歌士林華袞定如何當時不裂千金券利與今名問孰多僮僕幾二百口庭無怨言出其嘗事父母有勞者數十輩為平民不一錢取也銘曰洪範九疇福曰嚮用無以篤之其嚮焉動猗與毛公德潤在躬天命不僭保其初終先藏之卜有鬱者木永寧一丘子孫

是矚

白君寶墓誌銘

君寶姓白氏諱珪蜀之普州人世為儒家幼罹變故王父而止不譜也父震起有官於宋母文母馮兄景翰嘗第進士君寶馮出也今家京兆長安縣年未冠雅意方藥得事名先輩力學無晝夜出入古法盡得機要遂兼世之疾醫瘍醫而瘍醫尤號善治關輔生聚殷繁遠近貴賤病瘍者皆欲得注君藥日不暇食餘三十年天資



信厚濟以詳慎疾雖不可為猶必宛轉求治庶幾以生  
尤切切於貧且賤者以故人益愛敬之醫師屢舉職教  
事竟辭不就與朋輩遊退然若無能短長不出諸口御  
家甚嚴諸子皆紹業有聞門內肅如年七十八以大德  
癸卯冬十二月十六日卒聞者莫不咨惜明年正月癸  
酉葬長安縣苑西鄉大倉社配李氏卒再娶邢氏子男  
五人從禮安西路官醫提領李出也思敬乾州醫學正  
思溫思忠從禮思恭皆前死女四人俱適著姓孫男七

女四君自流離頓挫中堅苦就學復侍戎幕顛陷絕域  
百計脫歸以至于有家傳子若孫嗚呼艱哉思敬請銘  
某辱禮接不敢終辭乃為銘曰猗歟白君篤實慈祥奮  
起艱難志專力強不儒之逢乃醫之良歛彼呻吟躋此  
壽康人矜而爭我晦而彰有傳于家有愛于鄉八十三  
年歸安斯藏嗚呼後來視此銘章

興元路行用庫使張君墓誌銘

世或以矯情飾貌取譽於鄉黨宗族暫可能也今有人

焉慈祥忠信溫然慤然無戚踈小大均稱之為善人自  
始至終無異辭此豈聲音笑貌所能得哉有諸已而信  
諸人理不誣也其人為誰張君仲濟是已君諱楫仲濟  
字也先世邠之三水縣第六里人曾祖某祖贇皆不仕  
父浩仕金為敦武校尉母程生三子君序居二自少任  
家事孝友恭慎和易寬平蓋自性成敦武嘗病憂勞忘  
寢食百方求愈至刲股以進母病又如之喪祭哀誠兩  
盡事兄韓城令翼如事敦武接弟昭恩則兄而文則友

也隣里姻舊吉凶慶弔厚薄中禮而情意周洽居常怡  
怡然雖甚忤詞色不少異與人言唯恐傷之樂聞人善  
必再三咨美或毀此譏彼則漠若不吾與者家庭肅然  
教子學業慈而不敗故皆以卓越蚤致名位祿養雍愉  
人以是榮君又以是知善積之果獲報也君會計精審  
嘗歷安西路千斯倉副使轉運司豐濟庫副使興元路  
行用庫使中歲則優游自適日與耆年宿德相過從如  
韓令彥寶年幾八十尤不易與人交得君驩甚朝談暮

語無往不偕其為達尊慕悅如此大德八年六月己丑  
以疾不起親賓來者皆哭盡哀享年六十有七娶高氏  
婦順妻柔克配君子生五男長煒登仕佐郎延安路廊  
州判官次煜承直郎甘肅等處行中書省左右司員外  
郎次炫次炳次煇炫煇皆蚤世炳亦孝謹能家二女長  
適陝西行省宣使周璟次適成章孫五人四男一女適  
安西郎承應臺判石仲瑜初敦武徙居長安遂葬咸寧  
縣龍首鄉春明門東原煒等卜以九月癸酉窆君泣奉

行實之狀謁銘於某某與君里居分南北君每忘年禮  
接佩義深矣登仕昆仲哀懇復如此顧維淺拙不得辭  
也乃按其狀參以鄉論叙而銘之銘曰德輶如毛民鮮  
克舉如其舉之不曰賢矣維張仲君嗚呼洵美克弟克  
兄克父克子兢兢其容坦坦其裏六十七年有譽無毀  
好還者天其聽甚邇有子而才鸞鵠並起親名載榮積  
慶之始辭以告幽魂兮安只

張節婦墓誌銘

節婦張君故馬天祥吉父之妻諱珍國寶之母也京兆人父立母李氏金興定辛巳三月五日生年十有六歸馬氏時甫脫兵變民生甚艱君晝夜勤劬以婦職自勵上事君子下撫穉弱巢棲未輯而吉父歿矣廼悉力喪祭脂澤事不復意萌嘗自奮曰吾為人婦使馬氏無家何用生為子珍方十餘歲殺損服食資學鄉校賦家人職業勸勤懲惰纖悉有法小大信畏爭以功相多珍亦服君之訓孝而能家遂階完美之亨為鄉里著姓君之

志亦賢矣哉不幸珍不得終養時年已七十人皆以悲傷致疾為馬氏憂君能達理委命教育孤孫如其子昔時綜理繁細精明不衰大德辛丑有司上其節行樹表門閭後四年乙巳詔賜高年帛君復拜榮又明年乃以疾卒實丙午十二月二十三日也壽八十有六生子珍也二女長適葭州同知惠承事之子懷濟次許嫁張珪皆蚤世孫男一孝謙孫女二鄭思恭索天祐其壻也鄭氏婦亦卒曾孫男一齧齧君性嚴明濟以惠愛壺治可



法孝其母李迎養者十餘年歿為買地合其父葬之歲  
時祀焉睦隣里善嫻族周困窮恤患難鄉黨為內評者  
許有士行初吉父葬咸寧縣白華村君以其地卑洳改  
卜同縣龍首鄉廟坡東原至是孫孝謙舉其祖柩合葬  
君父珍從窆用丁未二月庚申從吉日也馬氏與某再  
世通家居又隣並每升堂拜君撫視如子孝謙來謁銘  
其何可辭銘曰丈夫立家舉不一二彼婦人兮敢以此  
議於戲節君金石其志既殖既封既茂既遂子雖不年

孫也能嗣壽祉載膺榮名斯萃合葬於防奚憾奚愧里人作詩以永厥懿

監納翟君墓誌銘

至大庚戌冬十有一月靖遠王邸管民提領翟從政介予知舊韓德卿任允中泣拜而請曰從政不天母氏生七十有三以六月十二日卒從政奉其喪於長安縣崇化坊親任鄉王化村先塋之昭乃者九月己卯父君又弃養蓋長母氏一歲矣將合葬防墓謀諸卜筮得此月

二十有七日庚午吉從政罪深禍酷忍死痛念生既不  
能為孝歿又無以圖永烏用子為幸哀而賜之銘以責  
慰泉下也予拙於為言重以目恙三辭不獲廼即行述  
叙而銘之君諱玉字潤之世為京兆長安縣人考與妣  
鄭氏生君丁酉九月七日六歲失所怙時家用寡乏母  
鄭勤劬絰績以資學業君亦蚤自植立精九章數法服  
勤家務卒能振大前業見稱鄉邦至元甲午有司以謹  
敏選監永興庫及行貨燕都泉府院知能信可任授母

錢俾專貿易始終無毫髮私人由是益知君不苟得也  
歲晚優游里社以疾終寢配劉氏端靜淑惠君勤孝起  
家中外輯睦相成之力為多生男二長從善得君計學  
能自立法為書早卒次即從政孫十人男六某某女四  
王好仁房德昌高汝明其婿也次未行君剛毅直實而  
識微見敏動合時變故所如獲饒贏雅好翰墨草書為  
時所賞資其孫璫讀書蔚有士風嫺戚交友咸愛重之  
嗚呼斯亦難能者矣銘曰艱難起家志力之雄遠近有

聞信義之充有妻偕老有子慎終焉鬣一封寧矣其崇

毛長官墓誌銘

毛甥彥修諱時敏世家安西曾祖文炳祖彪以勤敏致富考翼常為安西平陽河南等路打捕鷹房民匠長官安西慶陽拘橦解鹽使襟宇夷曠好賢樂善母同氏子再從女兒也今繼母宋氏彥修生而端慧凝重言笑有時祖父母鍾愛七八歲間晨起入鄉校得金釵於路持俟其主以還衆皆驚異奔告其家及鄉先生祖母輩卧

疾不去左右以衣寢者旬餘先父玉山翁謂吾家奇外  
孫長知嗜學記誦過人作詩句律不凡關輔佳士如王  
文振李友仁皆呼彥修為敬友既由公舉勅襲父長官  
職時已為隣舍延燒驚惶得心疾初猶獲藥喜後遂寢  
劇不復能如昔者之事事矣乃屏居長坂別業時節尚  
能集賓友為講會至大四年正月七日風淫暴作一夕  
而卒年五十有七娶田氏行省公之孫三女長適齊哩克  
琨總管石孟瑛次適田某次適田某卜以其月二十五

日葬咸寧縣洪固鄉三父村先塋嗚呼彥修得賦於天而成之在已者方力使其中不以疾廢必將登名禮法之場筵跡施為之會乃今止此而又無傳是可痛已予既誌其墓則哭之以辭曰謂天薄於子耶胡畀以純明之秀而享以完美之華謂天厚於子耶胡疾廢於方昌而又有不後之嗟祖力之勤父德之嘉其承如是而其終不可必者乃爾之差嗚呼奈何

耿伯祥墓誌銘


君諱復享字伯祥世居京兆考諱舜妣王氏生金正大  
甲申四月十二日孝慈寬謹由性而成展轉兵間醫傳  
不墜迨歸鄉里兩親怡熙順適安享色養壽考而終接  
姻舊以誠教諸子以學年五十九卒於家實至元壬午  
十一月三日也妻王氏前卒再娶尚氏子四人男三長  
廷秀武功縣稅使王出也次廷望承事郎陝西等處行  
中書省管勾承發架閣庫次廷輝延安路塞門巡檢女  
一適趙震孫男三人女二人後三十年當至大辛亥六



月戊辰尚君卒承事兄弟乃卜地咸寧縣龍首鄉孟村之原將以八月乙酉位祖封於中兩母祔君葬穴之昭時衰服持狀謁銘於某拜而言曰廷望上世皆葬縣之東陵鄉賈村年祀悠邈且兆域密邇不可再祔先祖遺命改卜廷望兄弟不忍違也惟先父之孝之德所以垂裕我後人者鬱而不昭將何以報罔極之恩乎幸吾子哀而賜之銘固辭不獲乃按其狀得君之孝尤著者方二親挾君在河南圍城中時纔八歲城陷之日大帥忿

其不即下無老幼悉命誅之次及君父母君故坐其下  
即躍上指謂使者曰是兒父母也寧獨殺兒無殺兒父  
母主者驚曰是兒不怖死白刃能祈活父母真孝子也  
白大帥并釋之嗚呼當橫尸無萬之際獨耿氏父母與  
子不鬼幽而人活者非孝誠格天能有此邪是不可無  
傳也銘曰惟孝於人百行之始猗嗟耿君篤于鶚齒知  
有吾親寧知有死夫誰使然曰愛之理汪汪其源洋洋  
其委傳不云乎在其孫子孟村之原龜兮告祉越千萬

年無壞傷只



渠菴集卷六

欽定四庫全書

集部

渠菴集卷七至九

詳校官庶吉士<sub>臣</sub>龍廷槐

侍讀<sub>臣</sub>孫球覆勘

滕錄貢生<sub>臣</sub>王穀

臆錄監生<sub>臣</sub>李光緒

欽定四庫全書

槩菴集卷七

元同恕撰

誌銘

扶風縣尹李君墓誌銘

皇慶元年六月一日故扶風縣尹李君夫人張氏卒其  
子思恭思溫將以八月二十七日偕縣尹君之柩葬咸  
寧縣龍首鄉先塋泣謂其游同某曰先君歿扶風官舍  
墓石時未具今願以銘屬子幸無讓某生晚辭拙先德

之懿將不辱歟思溫請益堅則敬叙之君名克忠因以  
為字先世京兆人生數歲而孤母楊氏撫育教飭嚴以  
濟慈課君誦六經論孟諸書日千餘言君亦秀慧警敏  
率十數過輒記不忘九歲中金童子科其後大兵起饑  
荒君負母流亡脫死萬一轉客楨州州守才君倚監稅  
務歲課益故常大姓張公某妻以其子既又徙河中籍  
名學官子孫因家焉歲癸丑忠肅楊公宣撫陝右道出  
境上君贄以詩忠肅大異之及設禮案首召君給使事

官制未行州縣令長由分間辟置中統建元川陝等路  
宣撫司檄君渭南縣尹兼軍民彈壓至元元年改行中  
書省申擬前職二年勅尹故縣丁母楊氏夫人憂服除  
更華陰長安扶風三政推誠與人專以德理不任刑罰  
吏民樂為用未嘗以不及事得罪州府奉法循義期盡  
吾職不為赫赫事以求知於人而人亦以是知君也壽  
六十有二以至元十三年六月十七日卒君寬慈和厚  
矜謹自將養母至孝流離艱棘中左右順適不忍少違

志意才具通朗始至河中謝帥謂君可專對令往來北  
地國言便習殆若性成嗜學老而益力公退讀書如童  
子時作詩清婉可愛常戒諸子曰吾家世儒者慎勿隕  
先業以為父祖恨張夫人柔良端靜竭力成家事君姑  
為孝婦相夫子為賢妻年九十有四集享備福鄉人莫  
不稱羨焉男四思敬思聰思恭思溫皆讀書有聞敬聰  
前卒女二長適從仕郎德陽縣尹王世英次適姚天翼  
亦俱歿孫男子女十二人曾孫男子女七人銘曰肅於外兮



坦于中才之備兮德之充如有用我博以宏吁此澤施  
止一同驥垂兩耳駕為龍隨所控制吾何恫于其子孫  
不于躬尚篤斯慶流無窮

族兄欽夫墓誌銘

兄諱摺字欽夫其先出自晉大夫伯子同氏家太原之  
文水繇高祖而上徙為京兆人曾祖諱安妣傅氏祖諱  
寧妣馮氏考諱景先妣李氏以丁酉歲八月三日生兄  
性彊明心計有餘而綜理周密年十五六考府君即委

以家事與其弟拯協心一力不懈寒暑資用饒給考妣  
養安終壽兄弟怡怡老而彌篤親族屬接賓友恩禮無  
爽日與游好樽俎為笑樂皇慶癸丑三月二十七日晨  
起既衣冠疾作不移時而逝享年七十有三配楊氏金  
進士商州防禦判官侯慶長外孫恭順慈良宜於族姻  
生四十九而卒蓋前二十七年也子六人男四長戴克  
幹父蠱次鶚讀書有聞掾甘肅省次海駒死中殤女二  
適張受祖楊文行孫男一女四戴等卜以明月十四日

葬咸寧縣洪固鄉三趙村先塋族弟恕為其銘曰惟劬  
惟勤以安其親惟優惟游以壽其身萬生芸芸孰是齊  
均永寧一丘式燕後人

承直郎成都路判官王君墓誌銘

君姓王氏世家奉元之同州曾祖侃祖成金進士出身  
晚以名德辟京兆總府講議官父才京兆酒使絅齋先  
生李公諂議為誌其墓母趙氏生三子君其長也諱舟  
字六彛方直通朗讀書有治才西蜀四川道提刑按察

司選主史書歷四川南道宣慰司掾四川等處行中書省掾元貞二年勅授承事郎同知成都路漢州事轉同知雲陽州秩滿改承直郎成都路總管府判官皇慶二年疾終官舍八月初一日也得年六十有六予堂兄與酒使游甚習且可君俊敏遂以壻其第四子淑慎恭柔克相夫賢從掾蜀而卒蓋前二十年矣生女有四俱適良士再娶陳氏亦前卒皆權厝漢州廣漢鄉一男曰恪君自幼為兒童開爽絕出倫比庠序師賞其樂學既

長有志世務遇事不苟其在簿領未嘗以私撓公長上  
率器倚之兩倅州治吏之黠者易為循慎民之戚者易  
為懼愉毗府不數月遽失輿望嗚呼惜哉延祐乙卯季  
弟長安縣尹壘由秦之蜀護三喪歸卜以八月十有四  
日庚寅合葬咸寧縣洪固鄉孟村先塋前事以姪恪來  
速銘乃哀而銘之銘曰太阿之利不剗犀兕株橛是試  
赤驥之良頓轡八荒出入尋常吁嗟承直百用而一已  
足有立如彼流泉尚濬吾源無遏其川

陳君墓誌銘

魯齋書院直學陳遜手其祖事狀一通泣拜而言曰祖  
父歿二十有六年矣藁殯僧舍今茲不天祖母任即世  
合葬有期敢以銘為請其幸賜之乃按其狀君慷慨能  
推己以義自勝者也癸巳之變生纔九歲父母哭二姊  
相失鋒鏑間流離瑣尾貼於九死既依里帥於平陽籍  
織工於太原復被徙哈喇和卓十有五年迨有居京兆  
咸寧以亡國之末裔為起家之始祖手拮据而口卒瘠

者為不少矣嗚呼艱哉君諱福世家河南鄭州密縣祖  
仕金為密令父千夫長生以正大乙酉卒以至元庚寅  
五月十一日享年六十有六元配李氏繼室任氏克脩  
內職以佐君子子男七林達榮次早卒思溫良英女一  
適李氏孫男十三詳弘德讓遜前為肅州文學掾餘未  
名女九四適人曾孫男女七李前三十二年卒年三十  
任氏歿於延祐乙卯五月己巳壽七十有七卜以是歲  
十二月二十二日丙申合葬咸寧縣洪固鄉黃渠東原

之塋銘曰嗟崐岡之火災兮紛玉石乎焚而萬有一其  
不俱燼兮夫或有以相之歸茲丘之四尺兮實百世焉  
所基

輔君明之墓誌銘

輔本晉大夫智氏由智果策智伯必滅宗更其姓為輔  
氏雖歷世綿遠不知昭穆何別蓋其苗裔也君諱昌字  
明之先祖仕金嘗官于秦因為秦人生泰和庚辰某月  
某日族屬衆盛星散兵間今為居任城者或通譜焉君



既涉變故斂藏智略施之家政教子治生翦翦有法鄉里推為信義君享年七十三以至元庚辰某月某日卒元配于氏生一女嫁劉德祿繼室上官氏柔明淑慎笄而歸君積勤累儉佐理家事君歿撫育諸子雖極慈愛而教切之義有加無替妻道母道兩克舉之後君三十五年當延祐乙卯十月某日卒壽八十有八生四子長世安次世榮大寧倉使次忠皆前歿次仁奉直大夫宣徽院都事一女適楊某孫男五人孫女二初君與于氏

葬長安縣槐衙里先塋至是卜遠日得丙辰三月庚申  
吉奉直將舉其柩合而葬焉其子公佐以奉直命來速  
銘銘曰智燭之圓炳乎幾先世胄嬋嫣兮志力之堅輔  
佐之賢家以載延兮子譽日宣飛騰俊躋有煒其傳兮  
襟山帶川松檟陰煙輔氏之阡兮

奉議大夫甘肅省理問爪爾佳公墓誌銘

公氏爪爾佳諱安仁仲寧其字萬戶招討使贈龍虎衛上  
將軍定襄郡貞敏公之曾孫行省贈榮祿大夫沔國忠

靖公之孫右丞贈榮祿大夫平章政事沔國宣惠公之  
第三子妣曰沔國夫人耶律氏生而端慧稱其家望宣  
惠公鍾愛之既長善騎射穎悟絕人國言與文嫻習若  
夙成勵志讀書語孟則尤所悉力若欲自得於已者書  
學慕王會稽擣嚴馬公謂其便能似之故家之耆年茂  
德皆樂與游至元二十六年大農以才辟掌國文時猶  
未冠也明年奏以承事郎令廣濟署三十一年陞同知  
德安等處軍民屯田總管府事稼政以修公私兩足大

德二年改同知陝西等處屯田總管府事首以歲荒民困力請蠲租額三萬斛先是有監州席勢縱其下牧馬秋稼且誣以故牧地強辨莫能屈民相率訴廉府廉使以公明信可倚俾竟其事公按籍非牧地乃詰之曰地則有籍蹂稼則有法法而不畏何如且此國計寧不知耶監州辭服即正其經界杖其奴計畝償所損民驩呼嗟感廉使謂真能世其家者三年宣惠公薨服喪過哀自是家居者十餘年皇上登極遷奉直大夫四川等處

行中書省理問所相副官公悉心營職蜀省無滯訟有  
所議反覆情法期於平允雖宰執不苟從讞獄重慶直  
萬戶郝某之寃渝士皆師之延祐改元轉奉議大夫甘  
肅等處行中書省理問所官平章榮祿公賢而禮之由  
儲侍會議陝省且為宣惠樹碑神道三年正月十有四  
日以疾卒清和里第之正寢年纔四十五矣遠近弔者  
皆哭失聲夫人蒙古氏無子後以弟仁實子徵女四人  
皆幼以其月三十日葬咸寧縣鳳棲原唐貴胄里沔公

墓側公長身玉立風度凝遠瞻者起敬而慈祥信厚藹然仁義人也為子弟以孝謹稱宣惠出典巨藩入贊大政賢勞靡暇而退食無門內之虞者以公能順適晨昏彌康健故也與人交久而後知其為敬友好賢樂善屈已下士無一毫世祿家氣習再為理官持心公恕法行而人不冤問語治體若緩若急秩秩有序使其引而見于施為尊主庇民之業足以光前而裕後孰謂天不可信而竟止於此邪是可悲矣公嘗遣徵從子學徵以銘

為請其忍辭諸銘曰嗚呼天之生才其有意邪其無意邪以為無意斯門也而有斯人也則固畀之以用世彼其盡美而全懿茲不曰宗廟之器以為有意戕戕之舟方將鼓枻而禍因觸石乃敗浮天之攸濟顧錯糅之不齊何至是乎繆繇此予所以痛惜乎才難不獨世閥之不繼也嗚呼

王君輔先生墓誌銘

延祐三年之春王乾州學事王君受正介友生字文鐸

垂謁款語移日其貌恭言從擇術甚正余固疑其詩承  
禮接不特器識之卓異也于後拜致族系里居之錄求  
銘先歲乃知果儒家子善為箕裘信矣哉謹按先生姓  
王氏諱輔字君輔其先蔡州確山人考諱郁徙家德安  
嘗職教其府妣李氏先生生于癸未歲四月十有六日  
年十三已能讀書屬文遭難流亡父子相失道過楊忠  
肅公愛其應對敏給輟後騎載之依舅氏許昌轉客秦  
鞏已乃家乾州隱居教授澹若與甘相忘者年五十四



以至元丙子二月九日卒配儀氏柔順端謹克勤內職  
後先生十七年歿至元癸巳十一月十一日也壽五十  
有九子男三椿卒大德八年栢即受正也桂女二朱榮  
張顯其壻也孫男八徵敏孜數餘幼女三葬其州孝節  
鄉西小張村之北原銘曰猗兩間之有生兮衆固不可  
以萬計也顧獨以士為名兮乃首出乎四類也雖道命  
不與人謀兮盖有曰懷奇而抱異也矧濟美之克世兮  
其又奚憾于下地也

倉使冉晦卿墓誌銘

鞏昌通渭縣主簿兼尉冉擇言將葬其父千斯倉使晦卿以兄伯仁之命來請曰伯仁等不孝永痛是罹今遠日得卜矣敢以銘問諸門下哀懇之情有不獲辭者及視所錄則曰晦卿質厚而信節儉而勤治家訓子咸有倫要以賢行選主奉元穀藏出納之當不失合倫通陰陽占繇學晚以恬澹寡欲自養勢利紛華不一動其心噫斯亦可謂好修之士矣晦卿諱瑛其先夔之梁山人

考德清妣胡氏始自秦州徙家奉元晦卿生己酉七月二十日享年六十有八配于氏生六子一女長伯仁承事郎鳳翔府扶風縣尹次思義次則擇言擇善肅州路儒學教授次擇行甘肅行省檢校書吏次擇禮女嫁侯居禮男孫四女孫九其卒以延祐三年三月二十九日其葬以五月十有九日其兆則咸寧縣神鹿原先塋也銘曰信以與人人以宜勤以立家家以肥生男衮衮衣綠緋六十八年蛻而歸嗚呼無憾其庶幾

臨潼縣尉雷君墓誌銘

雷氏世為耀州同官縣雷平川人後徙高陵之毗沙鎮  
子孫蕃衍遂為盛族君諱禎字彥禎以至元丙寅二月  
丁亥生兄弟六人君最幼溫厚謹敏蚤歲如成人讀書  
晝夜不倦奉侍親側得其歡心友五兄敬而順交游姻  
戚恩相愛而文相接其治生也勤其教子也義其御僮  
使也嚴而不苛豐於賓祭儉於自奉親仁就德救災恤  
貧此君之居家也至元己丑四川西道宣慰司辟為奏

差甲午陝西行省授平涼等處屯田提領勸課有方官民兩足大德戊申陞延安克戎巡檢壬寅改美原盜賊畏威遠遯兩司為之肅然至大辛亥勅授今職至即申明約束謹巡扞嚴督捕闔境安寢無草竊之虞縣當會府之衝冠蓋往來相屬于途君嘗攝縣政供億送迎禮無違者率皆歡愛焉禁戢豪橫扶掖善良尤悉心刑罪獄無冤繫同僚相與閭閻如也卒之日吏民皆慟哭此君之居官也曾祖遠妣曹氏祖定妣楊氏考貴累主四

縣簿妣傅氏杜氏兄鎮江等處新民人匠大使祐高陵  
稅使祥皆前歿三原縣尹禧安定縣尹裕其五祚也妻  
劉繼張子德詮德諱成紀儒學諭女一適王澤一在室  
孫女一人姪男女三十六人孫男女一十七人此君之  
父兄子姪也卒以延祐丙辰十一月乙巳葬以明年丁  
巳地以鎮北隅原慶安鄉之先塋祔以劉氏此君之送  
終也德諱嘗從予受業至是以銘為請義不得辭也銘  
曰出有譽於忠順入無疵於孝敬斯往行所難兼猗若

君兮力盛壽宜遐而中身祿宜豐而一命終天道者好還繇嗣葉之流慶

陰陽提舉焦君墓誌銘

中庸有言至誠之道可以前知又言至誠如神夫惟天道真實無妄故人之真實無妄者始可與議化育之妙而禹範於卜筮必曰擇人而建立之蓋其學問之功自明而誠無一毫私偽留於心目乃能合鬼神而一之彰往察來洞見朕兆非偶然也是豈口耳授受誕謾無實

者所得而云云哉求今師學得吾陰陽教授焦君潤之殆所謂誠者歟君諱榮溫純朴茂讀其父管勾公書一以至誠為力行之本易經而下歷世為五行言者累數十百家閎衍浩博皆出入貫穿決擇去取所以為資藉者益深且廣矣尤致力星禽書占百事以觀來物於人之靜作從逆榮瘁利鈍無一不中其會以故聲望四馳遠近延訪應接不暇王相左山公嘉其信而有徵大書所居曰覺齋一時名公鉅人如平章何公聰山太子



賓客王公山木翰林承旨姚公牧菴集賢學士宋公抑菴皆情交義接賁以詩文而集賢大學士方齋郭公既為次第世譜又序衍星以贈行斯可槩其為人矣初君擢安西延安興元鳳翔鞏昌等處陰陽都提領由左山公薦安西王敎提舉陝西四川等處陰陽學既罷提舉置敎授員勅授安西路陰陽敎授精勤舉職學者爭願出其門晚以疾辭著三元書二十卷板行之延祐四年夏五月十有六日召諸子戒以脩身無墜先業遂不起

疾享年七十配杜氏淑慎儀閨門四子澤輝州稅使漑  
將仕郎臨安宣慰司都事渥鞏昌路陰陽教授河延安  
路陰陽教授一女側室吳出也嫁百夫長郭良男孫九  
女孫八君博通儒學且熟醫說孝義慈厚非出勉力事  
管勾及妣胡曲極順適家事無劇易惟身任之兩親優  
游逸豫享有令終始其戶隸軍籍管勾嘗苦之至元甲  
戌詔遣使擇通儒術者不事征役君一試中等遂釋遠  
憂遇其弟一以誠愛始雖不恭終以怡怡與朋友以信

和鄉黨以謙廩其饑而藥其疾矜其長而覆其短故人  
無貴賤長少皆愛而樂之雖未嘗相識者聞人稱道姓  
名亦必曰是覺齋君邪嗚呼此可謂有道之士矣澤等  
卜以其年八月九日葬咸寧縣龍首鄉司天社先塋前  
事手君善狀一通泣拜請銘其墓且曰先人故交惟先  
生為知己予義不得辭乃撫其學行之懿可信今以傳  
後者叙而銘之若族世爵里之詳見於管勾公誌者茲  
不具銘曰至微者神至精者理稽疑之用脗合為美嗚

呼先生洗心以誠觀變玩占實紹天明曰吉曰凶如指  
諸掌靜者知歸作者知往若昔蜀嚴積豐取廉忠孝之  
勸乃今是瞻子也衣纓孫兮詩禮餘慶所鍾無窮伊始  
鄉曰龍首社曰司天馬鬣一封其千萬年

提舉梁君墓誌銘

延祐五年春二月十有四日提舉梁君益之卒卜以明  
月十有二日葬咸寧縣苑東鄉安家莊先塋季弟大成  
暨子壻姜煒持甥壻王文所書行實再拜請銘且曰先

兄有遺言誌墓之辭必以屬吾寬甫幸先生哀而賜之  
恭惟先君與其父義嘗通財提舉復尋盟舊好垂絕之  
託其忍以不文為辭謹按辭君名大用字益之世為乾  
州奉天人高祖斌曾祖均祖順考棟材由艱難起家徙  
居長安城中退菴張先生為誌其墓妣魏氏君自幼卓  
立不類常兒入鄉校師逸而功倍父母鍾愛之既長佐  
理家務益得歡心恪勤子職不懈寒暑飲食必嘗進出  
入必面告喪葬盡理祭祀盡誠苑東新阡實自君塋卜

事杜氏姊尤極弟敬有所為必咨決之愛二弟大有大成人不知為異母也與人交不苟合以義為主居常正衣冠無惰容戲笑家人惴惴威於鞭朴至元十九年行中書省以謹信有材幹檄為安西王掌膳局大使王知可任委下教陞同提舉尋為正君悉心職事始終二十年遇有絲髮得退即堅守素分無復進用意至大四年詹事院奏為人匠總管府經歷命未下牒趣就職君益以年老往辭不赴矣優游里居者餘十年既疾病處置

家事精明不亂出其僮使嘗有勞者十數輩為民仍俾  
近塋田俾奉祭事語畢而逝得年七十有二君凡五娶  
無子元配劉氏卒繼以王李王任前王及任亦先卒今  
皆合葬焉三女李出也長天次適西錦院提舉姜煒亦  
卒次許嫁楊孝思君天資剛嚴不借人言色然質直無  
機穽見世之工為柔佞以說人者疾之如讎或以私害  
公輒面數其非再三申戒故人雖內積不堪外實畏憚  
持顛扶危惟力是視勢家以奴陷平民輒理出之嘗善

黃冠師且死以其徒甲嗣事囑君乙懷媚嫉誣以盜馬  
欲規奪之君卒直其寃以信吾諾尊德樂義敦本務實  
崇禮讓貴廉耻殆所謂剛而塞彊而義者非邪是可銘  
已銘曰虞書九德彊義剛塞人一見之臯陶曰吉維提  
舉君氣養以直是是非非義形於色行宣不同正途是  
即量豈不容視惡如疾在家能家在職舉職七十二年  
其儀不忒葬從先人既安既適曷永厥存尚考斯石

渠菴集卷七